

23/08/2001

Teater perjuangan Harimau Malaya di Ipoh

KELAB Teater Rimba, Universiti Kebangsaan Malaysia (UKM) yang muncul juara keseluruhan Pekan Teater Kebangsaan tahun lalu sekali lagi akan mementaskan teater perjuangan dan patriotisme Harimau Malaya, Pejuang Gerila Force 136.

Teater berdasarkan skrip bekas Timbalan Naib Canselor UKM, Prof Datuk Dr Wan Hashim Wan Teh, diarahkan Diani Kasian dipentaskan semalam dan hari ini di Dewan Bankuet Bangunan Perak Darul Ridzuan, Ipoh.

Menteri Besar Perak, Datuk Seri Di Raja Mohd Tajol Rosli Tan Sri Ghazali, bersama isteri adalah antara tetamu kehormat menyaksikan teater itu yang diadakan sempena menyambut Hari Kebangsaan di Perak.

Teater Harimau Malaya memaparkan usaha Mejar Tengku Mahmood Mahyeeddin mengumpul anak muda Melayu di luar negeri untuk dilatih perang gerila di India dan Sri Lanka dan dihantar kembali ke Tanah Melayu untuk gerakan menentang Jepun dari dalam hutan.

Antara pejuang itu termasuklah Lt Kol Peter Dobree, Kepten Ibrahim Ismail, Kepten John Clifford, Lt Kol Richardson, Lt Mohd Nor Rani, Sarjan Bahari, Mat Nayan, Lt Roslan Johan, Abdullah Bima, Sub Lt Mohd Zain Hussien, Sub Lt Rahman Bux dan ramai lagi.

Gerakan di Hulu Perak dan di sekitar Raub - Kuala Lipis disertai beberapa anak tempatan seperti ADO Yeop Mahidin, Kapten Abdul Razak Hussein, Lt Ghazali Shafie, Koperal Lahamat Mat Piah, Wan Mohamed Wan Teh, dengan jumlah kekuatan di Perak, Pahang dan Kedah di sekitar 500 pejuang. Pementasan teater perjuangan yang mengambil masa dua jam ini dibintangi Datuk Jins Shamsuddin sebagai Kolonel Fijiyama, Jalaluddin Hassan sebagai Penghulu Keroh (ejen luar Force 136), Mejar Dr Mohamud Othman sebagai Lt Kol Peter Dobree, Raja Azura sebagai Bunga, anak Batin Pisang, serta seramai 50 pelakon kalangan siswa/i UKM dan beberapa orang pelakon undangan.

Ini adalah kali ketiga teater ini dipentaskan. Kali pertama dipentaskan pada Julai 1999 di Tapak Pesta Konvokesyen UKM dan kali kedua di Dewan Bandaraya Kuala Lumpur pada Februari 2000 dan disaksikan Datuk Seri Dr Mahathir Mohamad, bersama-sama Datuk Seri Dr Siti Hasmah Mohd Ali. Masuk dengan kad jemputan yang dikeluarkan Pejabat Setiausaha Kerajaan Negeri Perak.

(END)